



Sesida dals

Communitgà ils

Protocol nr.

29 d'avust 2023

31 d'avust 2023

685/2023

### **Incumbensa Loi**

concernent la publicaziun da las averturas da las offertas e communicaziun dals criteris d'agiudicaziun tar incumbensas dal chantun

### **Resposta da la Regenza**

Il dretg d'acquisiziun armonisà tranter la Confederaziun ed ils chantuns ha en mira – ultra dal diever duraivel da meds finansials publics, da la trasparenza da las proceduras da surdada, dal tractament equal e da la nundiscriminaziun dals offerents – er la promoziun da la concorrenza efficazia tranter ils offerents, en spezial tras mesiras cunter cunvegns da concorrenza inadmissiblas e cunter la corrupziun. En il rom da la participaziun a la nova Cunvegna interchantunala davart las acquisiziuns publicas (CIAP; DG 803.710) ha il chantun decidì, per motivs da trasparenza da la procedura, da mantegnair – sco in dals paucs chantuns – l'avertura publica da las offertas cun la pussaivladad da sa participar dals offerents participads a la procedura. Dapi l'introducziun dal nov dretg d'acquisiziun vegni percunter desistì da publitgar ils protocols da las averturas da las offertas en l'internet cun numnar ils offerents e lur pretschs d'offerta sco part da las mesiras da compliance introducidas cunter cunvegns cun la totalità dals chantuns. Il princip da trasparenza procura dentant, che proceduras d'acquisiziun ston esser chapavlas per tut ils offerents. Tenor la CIAP ston perquai ils criteris d'agiudicaziun decisivs vegnir communitgads vinavant en la publicaziun sezza u en ils documents da submissiun – da nov cun lur valitaziun. Per fixar ils criteris respectivs ston ultra da quai vegnir resguardads pli fitg ils criteris da qualità e da persistenza sco er ils custs dal ciclus da vita da las acquisiziuns. Ultra da quai ston decisziuns d'agiudicaziun en la procedura averta e selectiva sco er en la procedura directa, sch'i vegn applitgà in fatg excepziunal, vegnir publitgadas da nov en mintga cas sin la plattafurma d'internet Simap.ch che vegn manada cuminaivlaimain da la Confederaziun e dals chantuns. La Regenza è conscianta dal fatg, che questa midada da paradigma tar las acquisiziuns publicas chaschuna custs supplementars durant la fasa iniziala. Perquai vegn il chantun ad intensivair il barat specific periodic cun las represchentantas ed ils represchentants da las branschas. Quel preta ina contribuziun impurtanta per stabilir process d'acquisiziun plausibels e concis sco er per cuntanscher ina nova cultura da surdada.

*Tar il punct 1:* Tenor la veglia Ordinaziun da submissiun dal Grischun eran ils posts da surdada anc autorisads, da publitgar il protocol da las averturas da las offertas cun ils numns dals offerents ed ils pretschs d'offerta en l'internet. Pervia dal privel pli grond, che las subinterpresas potenzialas fetschian cunvegnas, sco er pervia da las finamiras ch'ins vul cuntanscher cun l'armonisaziun dal dretg, ha il chantun renunzià a questa publicaziun dal circol d'offerents e dals pretschs en la procedura d'acquistaziun currenta. Nagin chantun na conceda ozendi – ultra a las partidas da procedura – a terzas personas, sco furniturs u interpresas da transport, invista dals protocols da las averturas da las offertas.

*Tar il punct 2:* La CIAP fixescha per gronda part las prescripziuns da publicaziun per las adquisiziuns publicas, uschia ch'i na resta strusch pli spazi per regulaziuns spezialas chantunalas en quest sector. Uschia ston ils criteris d'agiudicaziun e lur valitaziun vegnir publitgads en la submissiun u en ils documents da submissiun tenor l'art. 29 al. 2 CIAP. Tut las submissiuns publicas ston vegnir publitgadas sin Simap.ch sco er supplementarmain en il Fegl uffizial chantunal. Ils posts d'acquistaziun chantunals adempleschan questas prescripziuns da publicaziun ed inditgeschan – ultra dals criteris d'agiudicaziun – per il solit schizunt ils subcriteris e las cumprovas decisivas en moda transparenta. Uschia è la pretensiun da l'incumbensa sut la cifra 2 gia ademplida. Per ulteriuras prescripziuns na datti nagin motiv ord vista da la Regenza.

*Tar il punct 3:* Quest giavisch è garantì suffizientamain cun las novas prescripziuns d'acquistaziun. En il chantun Grischun pon ils offerents participar a l'avertura da las offertas e survegnan per regla gia immediatamain suenter l'avertura il protocol da las averturas da las offertas sin via electronica. Las agiudicaziuns che ston da nov vegnir publitgadas sin Simap.ch e che pon uschia vegnir consultadas da la publicitad, ston vegnir motivadas en moda summarica e ston en spezial cuntegnair las caracteristicas decisivas sco er ils avantatgs da l'offerta resguardada. Ils offerents che n'èn betg vegnids resguardads han en il Grischun ultra da quai il dretg d'in debriefing, en il qual il post d'acquistaziun als sto preschentar ils motivs principals, per ils quals lur offerta n'è betg vegnida resguardada. En auters chantuns vegnan ils offerents renviads – senza questa pussaivladad da l'attenziun giuridica – directamain a la Dretgira administrativa chantunala.

Sa basond sin questas explicaziuns propona la Regenza al Cussegl grond da refusar questa incumbensa.



En num da la Regenza

Il president:

Peter Peyer

Il chancelier:

Daniel Spadin